

存蕪集

洛溪遊子

目錄

五言古詩.....	一四
述志.....	一四
古風次太白韻.....	一四
昨夜雪爛漫.....	一四
伊州大雪.....	一四
擬古行行復行行.....	一五
擬古明月何皎皎.....	一五
七言古詩.....	一六
普陀觀日出有感.....	一六
五言絕句.....	一七
佳人.....	一七
重讀《萬葉集》有感.....	一七
病中作.....	一七
井蛙三章.....	一七
2013 年美國國慶.....	一七
看山.....	一八
孤禾.....	一八
中元夜思.....	一八
遠行示人.....	一八
別兒.....	一八
新歲作.....	一八
希臘問路四則.....	一九
於某論壇拾得舊作，錄諸詩集，因戲作.....	一九
寒山體三首.....	一九
憶幼時與父捕魚.....	二〇

初春	二〇
哀海魚	二〇
秋日絕句四首	二〇
康州赤晴日初雪疑自波士頓飄來	二〇
六言絕句	二一
闕題	二一
客居紐約 次韻荊公題西太一宮壁	二一
八有	二一
七言絕句	二二
八尺男兒	二二
詠 911	二二
躍馬狂歌	二二
詠唐詩大家	二二
海中登山乃作四藝歌	二二
人日梅開客至作詩一首	二二
詠李杜	二三
因釣魚島書事	二三
月下作	二三
嘆李斯	二三
黑窑	二三
詠影帝	二三
江郎浮海歌	二三
颱風過後歸紐約陋室有感	二四
書事十二首	二四
回鄉偶書二首	二五
綠葉	二五
耶魯露天音樂節聽吳蠻彈琵琶及唱歌	二五
錦衣	二五

桃人.....	二六
畢業十五年後喬州逢曹君又送別之西雅圖.....	二六
船家四首.....	二六
傷心.....	二六
康州六月三首.....	二六
紅頭紙片.....	二七
戲作同性婚姻.....	二七
口占一絕.....	二七
轉世潘安昭告天下賸女書.....	二七
中興.....	二七
歸鄉.....	二七
偶訪皇都三首.....	二七
官場現形記.....	二八
詠煙柱群并贈人.....	二八
月餅二首.....	二八
因窺詩示妻.....	二八
這就是美國二首.....	二八
憶江南一組.....	二九
甲午雜詩.....	三〇
不諳書法自嘲.....	三〇
國詩賽後寄友.....	三一
詩賽.....	三一
感雪三章.....	三一
詩社林立互相攻訐有感.....	三一
讀《報任安書》有感.....	三二
鄰樹開花.....	三二
讀某些詩賽作品隨感.....	三二
小兒一周歲作示兒兩首.....	三二

賣材	三三
石景山觀樹寓意	三三
詠清代詩人五首	三三
讀《戲答元珍》戲作	三三
自嘲中年增肥	三四
戲人中年發福	三四
鄰松夜折寓意	三四
回國見聞錄幾則	三四
聖誕節前一天上班	三五
詠雷三章	三五
有感世界各地戰事	三六
瀑布	三六
初中諸君開同窗會因作	三六
有感於 Drexel Hamilton 股票分析公司	三六
時事有感三則	三六
告故人	三七
忽得初中班主任電郵有感	三七
日落	三七
五言律詩	三八
夜宿擬古	三八
壬辰七夕	三八
八月	三八
壬辰白露	三八
九月	三八
壬辰重陽	三九
桃花	三九
癡心	三九
釣魚臺	三九

夏日北卡州山中漂流.....	三九
夫子華誕日作詩而嘆之.....	三九
桂月寄人.....	四〇
羈泊紐約詠懷.....	四〇
歧路.....	四〇
危路五首.....	四〇
壬辰寒露懷友.....	四一
剝王維.....	四一
登樓賦集字十首.....	四一
胡錦濤全退而書事.....	四二
陋室吟.....	四二
赴美十七周年作二首.....	四二
夢遊廣寒.....	四三
哀良馬.....	四三
癸巳端午節於紐黑文作.....	四三
訪舊.....	四三
詠石.....	四三
踏山見一橙色樹於眾綠之中感而賦詩.....	四四
地鐵五味.....	四四
曼哈頓島晤故人沈君并送別.....	四四
裸官.....	四四
油歌.....	四四
獨步紐約中央公園.....	四五
客中自題.....	四五
秋遊落基山國家公園.....	四五
懶覺寓嘆.....	四五
送學生歸國.....	四五
讀《悲憤詩》有感.....	四五

書歸有懷	四六
甲午七夕感作	四六
耶魯大學 Phelps 門前晤別高中班主任王老師之波士頓	四六
周獲魯獎有感二首	四六
有蜨	四七
有鳶	四七
有鰐	四七
贈韓國同事殷教授	四七
聖誕夜回康州火車中作	四七
夢後作	四八
贈某學弟	四八
2015 年年首自題	四八
思張益唐事感作	四八
憶同學中棄家室及博士學位而出家者	四九
與博士生時同學曹張二君宴於時代廣場	四九
戲同事喻君娶鋼琴老師	四九
康州寒舍寫興二首	四九
醉意	五〇
炒股兩首	五〇
秋葉	五〇
遊 Hammonasset 海灘州立公園	五〇
客中秋雨有懷	五一
夜讀賈島《送別》	五一
得故人書	五一
周一六時未至起赴紐約上班火車中作	五一
題格那丁	五一
題鏡山	五二
六言律詩	五三

心鬼.....	五三
七言律詩.....	五四
次長征韻二首.....	五四
壬辰國難日懷岳武穆王.....	五四
壬辰中秋夜詠懷.....	五四
華爾街.....	五四
曼哈頓島.....	五五
遊聖胡安原始雨林.....	五五
一千三百年華誕詠杜工部.....	五五
和紅塵邊上客《壬辰仲秋山居有賦》.....	五五
壬辰中秋夜紐黑文遙思故里海寧潮詠懷.....	五五
壬辰初度歌.....	五六
詠韋應物.....	五六
自嘲詩.....	五六
詠謫仙人.....	五六
詠李長吉.....	五六
登高.....	五六
譏王維.....	五七
詠王之渙.....	五七
感恩節賦得.....	五七
戲韓愈.....	五七
憶大學生涯.....	五七
憶童年.....	五八
自紐約之紐黑文列車中逢雨戲作.....	五八
文憑.....	五八
佚題.....	五八
元凶.....	五八
天問.....	五九

血同源	五九
造詩記	五九
劫	五九
適芝加哥迎江郎訪美	五九
露水	六〇
四外當於漢語強	六〇
鑒湖女俠頌	六〇
讀史	六〇
贈某論壇評詩達人	六〇
癸巳處暑自題	六〇
詠賈長江	六一
梧桐	六一
剝紀昀	六一
也說詩賽	六一
登紐黑文 East Rock 望海有感新舊兩首	六一
貪官與民工兩首用同韻	六二
發表科研論文有感	六二
酬紅塵邊上客《臨屏贈羈旅紐約 M 君》	六二
三江歌	六二
挈燈人 一向葉嘉瑩老師致敬	六二
憶高中生涯	六三
補作癸巳初度歌	六三
此女	六三
夜望星空	六三
老父種菜除害二首	六三
學詩二首	六四
憶恩師	六四
治國數字歌	六四

登高感秋	六五
補作遊圓明園	六五
感舊四首	六五
訪官寺兩首	六五
煤山詞	六六
甲午立秋作	六六
讀杜老《秋興八首》有感	六六
讀國詩賽行卷贈扁舟詩友	六六
讀國詩賽行卷戲贈羅衷美	六六
讀國詩賽行卷戲贈顧青翎	六七
讀國詩賽行卷戲贈韋散木兄	六七
憶幼時與父並肩搖櫓夜行作	六七
風花雪月四章•風	六七
恭祝 52 詩友新春快樂	六八
康州冬日雜詠	六八
甲午不惑年初度歌	六八
刪詩戲作	六八
美女效萬楚	六八
於紐約大學代課	六九
偶作	六九
代妻	六九
有感中國近現代歷史	六九
語紐約	六九
金正恩	七〇
弔黃公公度	七〇
於紐黑文過年	七〇
小兒十四個月學步	七〇
元宵節父生辰日於紐約逢雪	七〇

重讀楊憲益《銀翹集》	七〇
重讀聶紺弩	七一
唐太宗	七一
九一八周年隨感	七一
乙未中秋感作	七一
二十餘年後於紐約邂逅 W 君有感	七一
十三覃歌之炒股秘訣	七二
耶魯大學博物館內見商周瑚簋	七二
炒股有言贈妻	七二
讀同邑才女查蕙纈《驛亭題壁》	七二
南沙時事有感	七三
五言排律	七四
登希臘邁泰奧拉有感	七四
遊大提頓國家公園賦得十二韻	七四
憶新疆姑娘	七四
賦得我輩復登臨得臨字五言六韻	七五
紉秋蘭以為佩	七五
樂府	七六
獨不見	七六
遊子吟 男兒志四方	七六
子夜吳歌四首	七六
日居月諸	七六
善哉行八解 來日大難 其一 不得其死	七七
善哉行八解 來日大難 其二 不得其時	七七
善哉行 古道有高槐	七七
詞曲	七八
【踏莎行】客居紐約	七八
【西江月】紅葉	七八
【滿江紅】喜聞遼寧號服役	七八

【紅情】紅情賦紅蓮.....	七八
【臨江仙】反貪有感.....	七九
【浣溪沙】不惑年生日戲作.....	七九
【南呂・四塊玉】春來.....	七九
【中呂・朝天子】曲苑小插曲.....	八〇
【雙調・折桂令】時光.....	八〇
【中呂・上小樓】山上苗.....	八〇
【中呂・山坡羊】三國尾聲嘆.....	八〇
【雙調・水仙子】紐約春節上班.....	八一
【雙調・落梅風】約人.....	八一

五言古詩

述志

我本洛溪人，不守先祖地。區區晚學子，賦詩無所忌。乏墨強舉筆，自愧徒有字。百代書略觀，何能抒我意？眾生噪噪西，我志豈逐利？飄蕩行天下，玄卷深山致。神人幽谷遇，啓我此中秘。何當御長風，搏空展鯢翅。熱我炎黃血，一為開民智。眾心皆堯舜，治世不設吏。宇內待清一，退與群童戲。獨舟東海浪，三島尋幽異。

古風次太白韻

小騷久不作，吾衰竟誰陳。情途委蔓草，身事多荆榛。男女欲啖食，慘狀逮狂秦。鵲橋血茫茫，何處覓佳人？擲石生黑波，愴然恨無垠。離合總萬變，操行亦皆淪。無懼獨孤來，美帥豈足珍？人心久不古，礪石難歸真。淚落似雨泄，心痛如拔鱗。文質何時煥？重雲遮秋旻。怨念常自述，柳暗不見春。三十身不立，萬古同悲麟。

昨夜雪爛漫

昨夜雪爛漫，地凍天又寒。遊子懷苦思，惻愴不能安。零落數十載，未嘗添衣冠。顧思富家子，榮光一何歡。有錢能倜儻，無錢越冬難。

伊州大雪

域外雪若席，宇宙鴻濛間。瞬息絕草木，未已覆遠山。茫茫只一片，造化何空然。凜冽朔氣白，悻悻老雀寒。眾犬吠不住，異客自慘顏。零落似轉蓬，欲去不擇年。一世一劫簸，我願悟塵凡。跣足大塊上，散髮詠江南。

擬古行行復行行

行行復行行，道途阻且塞。冬陽日以微，遊子日以惻。孤雀寒冰裏，十振不展翼。
中路鳴失偶，聞者皆嘆息。戰戰復兢兢，常恐鷹隼得。低頭思所遭，淒惶意何極。
萬物皆天設，我獨陷荆棘。別離何咄咄，如此嚴相逼！

擬古明月何皎皎

明月何皎皎，照我中庭樹。紅豆兩三枝，今晨春早度。忽聞雙鳥啼，低首不能顧。
卻念足邊草，依依情似故。務乘韶景歸，莫逐功名誤。

七言古詩

普陀觀日出有感

海闊天空海鳥飛，佛山風光收眼底。一派蒼翠托紅日，數聲漁笛碎凝碧。但恨茅屋風中抖，我見金沙心不喜。菩薩高坐享香火，豈管草棚農人泣？

注：

一 一九八六年，時小學五年級作。

五言絕句

佳人

青山白雲裏，紅袖翠樓旁。風起香鬟亂，花飛玉臂揚。

重讀《萬葉集》有感

洋洋幾萬行，半數詠天皇。韻味渾無迹，論詩確屬唐。

病中作

臥病不悲歌，浮生有幾何？身過昌谷壽，詩比放翁多。

井蛙三章

美玉落荒井，俯聽無一聲。長吁方欲去，鼓噪亂蛙鳴。

連雨沒深井，井蛙枝上鳴。不鳴天地闊，只嘆幾時晴。

一統信非夸，自由正可家。雖知天地廣，井外有官蛙。

2013 年美國國慶

兼天聞爆竹，竟夜見烟花。管是遊人醉，不知夷與華。

看山

自別江南去，春遊只看山。生來雖愛水，見水憶鄉關。

孤禾

孤禾阡陌上，飲露自蔥蔥。今日耘鋤死，只緣生草中。

中元夜思

中元人不寐，山上望初秋。時見雲邊月，團光海盡頭。

遠行示人

2014/12/26

此去莫悲遠，無非四海中。今朝不分別，何處得重逢！

別兒

2014/12/29

我欲負囊去，稚兒匍匐追。仰頭揮小手，憨笑未知悲。

新歲作

2015/1/1

男兒未酬志，慷慨不低眉。拔劍向天地，舍予其復誰？

希臘問路四則

2015/1/2

雅典城中心步行問路得告

“此去路非艱，唯須拐十彎。郎君宜小慎，左右雜其間。”

自雅典驅車往格林斯，許久未至，乃出高速於一小鎮問餘程幾何
老嫗殷勤算，言須兩小時。驅車未一刻，已入格林斯。

自 Delphi 往 Karanbaka 途中誤入民舍，問路於澆花大爺但言語不通
大爺光上身，不語笑容親。早料之何處，畫圖圈要津。

歸雅典車中問路遇當地華裔少女

觀彼覺華裔，他鄉訝且欣。相詢尚英語，指點已中文。

於某論壇拾得舊作，錄諸詩集，因戲作

2015/1/10

神遊攜手去，興盡忘君歸。重聚莫垂淚，良辰再共飛。

寒山體三首

2015/1/25

元寶皆稱銀，竈灰都道黑。請君稍比量，原是相同色。

權錢名與色，都願挂心頭。長見心頭肉，轉成身上癩。

古賢遺至言，哀莫甚心死。君問秦城人，皆云不得已。

憶幼時與父捕魚

2015/1/31

撒網木排下，停竿水草間。兩人相伴坐，風雨不須還。

初春

輕黃未著枝，濃紫已堪期。欲覓東君迹，請聽前澗澌。

哀海魚

2015/9/30

近日見人垂釣海邊，因作寒山體一首

早逐白湍流，曾經北海遊。逍遙三萬里，止在一纖鉤。

秋日絕句四首

2015/10/1

歸鳥絕長空，天垠一處紅。秋來無限意，盡在暮雲中。

寒宵雨瀝瀝，時緩時悲激。晨起視梧桐，猶將清淚滴。

鄉遠暮雲垂，中心悲復悲。秋風最生恨，卷葉入書帷。

客思正淒淒，蟲聲斷且低。如何幽怨意，偏向恨人啼？

康州赤晴日初雪疑自波士頓飄來

無力對晴暉，須時不見痕。獨餘天地客，吟苦為招魂。

六言絕句

闕題

熟看晚雨成畫，乍聽秋風作詩。歲歲年年老去，當中苦味誰知？

客居紐約 次韻荆公題西太一宮壁

夢中猶記吳地，曉晚霞飛海西。誰解書生意氣？笑看紙醉金迷。

八有

有佞有賢舊識，有真有假山盟。有生有死心路，有淚有歡客程。

七言絕句

八尺男兒

八尺男兒志守邊，金戈鐵馬草中眠。九州安泰心頭計，一把龍泉枕上懸。

詠 911

船堅炮利黑金流，機毀樓亡死士囚。船炮難平天下怒，一私中飽萬家愁。

躍馬狂歌

躍馬狂歌一快鞭，一鞭去國廿餘年。當年叱吒凌雲志，半作鄉愁半作煙。

詠唐詩大家

天造青蓮萬世驚，高山仰止大江橫。柳韓杜白齊清秀，不剩風情眾艷爭。

海中登山乃作四藝歌

旭日垂光山作畫，春風解凍澗彈琴。沉兼海島如棋布，雲作狂書悅我心。

人日梅開客至作詩一首

九曲紅梅著綠苔，天寒地凍喜顏開。花枝不恨新年盡，香馥還招舊友來。

詠李杜

日月相逢信有神，詩情俊逸性情真。艱難苦恨一杯去，攜手同遊羨殺人。

因釣魚島書事

漢姬夜夜泣胡天，胡馬年年踏漢川。不用和親用飛將，匈奴早遁暮雲邊。

月下作

遠阜含煙弄薄陰，清商鳴葉別空林。玉鉤不解相思苦，懸盡人間蕩子心。

嘆李斯

苟奸殺友更焚書，小事齊賢大事愚。撫犬長吟腰斬日，可曾片刻憶扶蘇？

黑窑

心中碩鼠舞翩跹，道德仍能挂嘴邊。上百民工生死裏，斯人猶在數銅錢。

詠影帝

無限柔情慣弄悲，人前立可淚垂垂。東方只識滑稽事，天下顰眉舍我誰？

江郎浮海歌

暢浮死海逸思多，大腹渾圓積幾何？三百禁軍沿岸列，碧波深處看皇哥。

颱風過後歸紐約陋室有感

三萬六千纔幾時，明朝氣絕復誰知？問君十載今何有？四堵空牆一個癡！

書事十二首

內遷

此去京門屬內遷，春風赫赫馬翩翩。遼城弱稚來歡送，各賞薄家三百錢。

鐵雞

汶川國難斷人腸，華夏同胞競解囊。外企一毛遲不拔，薄郎斥責網民忙。

薄郎怨君

王孫既作封疆吏，翹首搖臀求帝至。秋水望穿一騎來，誰知竟是周常侍。

薄郎怨婦

胯下風流意自傷，王妃抱鴨正顛狂。忽思金谷綠珠事，卻悟名門不及娼。

雄名

山雨欲來心自閑，紅歌玩罷玩紅顏。王孫胯下豈凡物，但取雄名在世間。

上邪曲

平西府內狗張狂，月滿羅裳血滿牀。莫嘆今宵真戲劇，須知後事更荒唐。

詠平西王妃

聖代奇觀自絕倫，王妃夜半戮夷人。若非番犬騫牆事，猶是炊金戴玉身。

詠平西王

紅顏朱檻舊曾諳，今日縲囚作笑談。我告鍾馗休得意，尙餘妖孽在中南。

詠平西王府

玉樓粉壁燦如銀，賈去娼來笑語頻。後苑不知人已棄，浮花空發葉徒新。

哀元帥

帝後夭殤幾人泣，權豪多子萬民悲。莫如元帥絕宗嗣，尙得清名代代垂。

哀王孫

無限春光笑靨開，呼風喚雨逞奸才。一朝失計為囚去，十惡滔天接踵來。

除惡

紅歌綠舞賽瓊臺，露水鴛鴦去復來。除惡何須往重慶，薄家大院向陽開。

回鄉偶書二首

未及病橋迎病孩，削葭作笛發音哀。舊時不待吹三哨，狂叫群童卷地來。

老槐舊夢互紆縈，月照秋蟬戰戰鳴。遠客昨來今即去，青兜亦沒不須驚。

綠葉

鬱鬱山尖作小叢，無蜂無蝶也融融，但求自在四時綠，不羨金瓶一夜紅。

耶魯露天音樂節聽吳蠻彈琵琶及唱歌

葡萄嫋酪沐斜陽，美酒一樽青草香。最是吳蠻歌與曲，教人陶醉欲癡狂。

錦衣

人道有情天亦老，自知無的水空流。可憐為客十餘載，未得錦衣先得愁。

桃人

明知歸去易存身，客裏一春猶一春。汜濫無休終不悔，管他土偶勝桃人。

畢業十五年後喬州逢曹君又送別之西雅圖

四月喬州春正濃，花紅柳綠一重重。此情此景君須記，他日他鄉難再逢。

船家四首

一葉烏篷萬里家，夫妻合力走天涯。天涯處處有流水，長伴身旁共歲華。

曲櫓曲舟行曲水，斜風斜雨過斜橋。前村路轉酒旗現，粗計應無一里遙。

日麗風和細柳斜，停船上岸問人家。將魚換得油鹽醋，捋袖正烹新捕蝦。

潮平岸闊萬燈明，風正帆懸一葉輕。莫道船中天地小，五湖四海任吾行。

傷心

父母居家長遠遊，更兼骨肉散他州。傷心心事傷心處，稍不留心心上頭。

康州六月三首

六月離懷最不堪，康州無故學江南。江花脈脈紅於火，江水依依綠似藍。

風搖最合臥芳菲，萬里羈懷轉瞬揮。久看白雲渾不動，青山共我向東飛。

六月康州最是春，百般吟詠不如真。青山碧水仍相愛，萬里酬詩第一人。

紅頭紙片

假油假藥假牛嫻，真法真官真橫財。東亞病夫如廁去，紅頭紙片作何來？

戲作同性婚姻

山河早已不滄桑，社會變遷來日長。子美甘為樊噲婦，誰云無嫻定非娘。

口占一絕

萱草難知歲月移，珠簾猶記悵然時。晨來困倦無聊賴，閑步小園吟舊詩。

轉世潘安昭告天下賸女書

萬般只是朱顏改，前世潘郎去又來。借問天涯長賸女，如今幾個愛文才？

中興

唐堯虞舜今難考，商紂周幽古有憑。稼穡從來為下作，誅屠總道是中興。

歸鄉

世間皆道歸鄉好，歸得家鄉又若何。獨立橋頭人不識，空嘆落葉逐寒波。

偶訪皇都三首

久處陋夷身自卑，皇都更浪子無為。出門囧囧恐遭問，我爸李剛君又誰？

世襲民工窮巷泣，天生官賈眾姝隨。朱樓堪詠阿房賦，粉壁催思大鐵錐。

碑石巍峨志逝賢，鞠躬致敬背朝天。忽聞身後聲淒厲，哪個蟲兒敢在前？

官場現形記

得志小兒成克傑，失常老大薄熙來。官場新版現形記，頻演中央電視臺。

詠煙柱群并贈人

煙柱破空粗且黑，互夸正直恣相歡。可憐未及風聲起，扭曲歪邪已抱團。

月餅二首

一年一度過中秋，月餅惹來無限愁。縱使能知發霉貨，也應難避地溝油。

雞毛文件反貪污，不指王公指軟酥。行賄如今皆現漚，問他月餅又何辜？

因窺詩示妻

字字關天欲擇難，誰人窺視暗中歡？造詩不似卿臨鏡，妝未成時反耐看。

這就是美國二首

看電視

早猜伊國會丟城，更怕希婆老賣萌。窮極無聊換頻道，鄰州小學又槍聲。

紐約周三

一到清晨禮拜三，心情抑鬱比天藍。沿街垃圾如山積，臭氣重重未可堪。

憶江南一組

2014/8/15

南湖舊約

我約南湖在舊遊，學成重泛雨中舟。八年一紙文憑後，已負南湖十個秋。

新居落成

江南民居廚房“竈山”上必有“竈花”。通常正面畫有竹魚，取諧音“火燭平安”和“年年有餘”之意。反面則有倒寫之“火”字。

聲聲鞭炮賀新居，酒醉人歡沸里閭。最喜竈花初著色，一庭翠竹一池魚。

古鎮鈴聲

家鄉是江南水鄉依河而建小鎮，多木質古屋。黃昏時有老叟提鈴巡視全鎮，以警火燭。

耆叟提鈴暮色迷，小心火燭引聲低。依河漸漸朝東去，又伴風來直到西。

雙搶時節

“双抢”，指抢收庄稼和抢种庄稼。水稻在南方一般种两季，七月早稻成熟，收割后得立即耕田插秧。如果晚了季节，晚稻收成将大减。这时，学校会放农忙假。

搶完早稻尚浮埃，即拔晚禾疏裏栽。童稚炎天提飯盒，也翻鐵路地頭來。

船頭新娘

鑼鼓喧天彩帶揚，船頭端坐是新娘。紅巾纖薄遮羞面，笑聽兒童數嫁妝。

甲午雜詩

盛唐氣象早雲邊，甲午衰積似眼前。我勸國人齊發奮，重拋夷狄五千年！

國際風雲正變遷，列強環伺似當年。不將刀俎便魚肉，莫作杞人憂九天！

新疆恐怖分子

是誰法外養凶殘，兩少荒唐更一寬？可憐分明官作孽，小民拚命去埋單。

時有客從東來，但言人多是患。愚昧甚矣，因作此詩。

愚民數億足悲歌，但語官云盡入魔。我有真言開懵昧，積貧不坐國人多。

應嘆地震太無常，豆蔻年華哭逝亡。多難由來推校舍，官衙總是最堅強。

多少風光周薄徐，哪知個個是元渠。欲提怒筆還輕放，為黨遮羞不忍書。

緣何拜鬼路人知，軍國陰魂欲借屍。義喪何須唇舌辯，萬年仍舊是倭夷。

泄欲但須尋美美，卜官亦可問王林。時逢聖代多奇事，只怕騷人不及吟。

連降七級

中紀委通報，雲南省委某常委被降為副處級；江西省委某常委連降 7 級為科員。

舉世知羞冷笑看，我聞咄咄也無歡。聖朝畢竟多甘露，贓款一交仍作官。

不諳書法自嘲

拼音代字已羞臊，電腦時時又捉刀。我比定庵多一恨，更無美妾善揮毫。

國詩賽後寄友

2014/12/26

勿恥名居諸劣後，當矜才在眾英前。小詩雖陋聊相勸：守住心中一片天！

詩賽

2015/1/4

撥開黑霧幾多層，評委誰知是黨朋。朱筆一揮諸子愕，只猜草率與低能。

感雪三章

2015/1/9

層層素雪覆山林，咸道天光正可吟。縱使傾將銀漢水，難添潔白到人心。

光如世事總難平，山腳陰寒山頂明。我願此生長似雪，化冰剔透化雲清。

片片相催筆不開，擬鹽作絮總非才。低吟未就回頭望，天帝修成白玉臺。

詩社林立互相攻訐有感

2015/1/11

一片騷壇殺伐聲，各搖皂纛據孤城。詩歌本為言心志，李杜從來不結盟。

讀《報任安書》有感

2015/1/12

《報任安書》，真天下第一書信也。“行莫醜於辱先，詬莫大於宮刑”，則斯人之負恥可知。“草創未就，會遭此禍，惜其不成，是以就極刑而無愠色”，則斯人之負重可知。“腸一日而九回，居則忽忽若有所亡，出則不知其所往”，則斯人之負悲可知。而終“究天人之際，通古今之變，成一家之言”，則斯人居功之至偉可知。嗟夫！子曰，求仁得仁，又何怨哉！於斯人，吾謂至矣。

都歌猛士走江東，我仰文人廢己躬。敢問逃羞同負重，當真若個是英雄？

鄰樹開花

2015/1/14

遙觀方識美如霞，近看無非一樹花。我謝東風多眷顧，總將春色置鄰家。

讀某些詩賽作品隨感

2014/1/5

命途多折育才人，氣骨清時最易淪。文字光鮮何足取，作詩貴在感情真。

小兒一周歲作示兒兩首

2015/1/16

思義之名，其母取自《論語》“見得思義”。

客中再客恨無垠，況值吾兒學語頻。可嘆一周歸二日，卻於乃父最相親。

思義吾兒汝記真，須憂無識莫憂貧。我於今日無他望：做個堂堂正正人。

賣材

2015/1/18

十年鑄斧未言遲，久入深山歲自知。杞梓楸枏無識者，工夫盡誤賣材時。

石景山觀樹寓意

2015/1/20

都矜孤拔未曾盤，近看青光實實團。嘆爾齊能無動息，送他蘿蔦入雲端。

詠清代詩人五首

2015/1/21

詠蒲松齡

天公只怕最憐才，未遣蒲郎入帝臺。一部鬼書看不厭，夜長盡盼女狐來。

讀詩詠吳偉業

剃髮山盟早食言，自知欠死更營田。可憐鄙俗圓圓曲，糟蹋無辜字一千。

讀詩詠屈大均

太白豪情子獨持，天傾偏欲以身支。滿腔熱血和真愛，凝就千秋不滅詩。

讀詩詠錢謙益

國破能存項上頭，有嬌有業漫啼愁。區區幾滴清閑淚，欲洗金陵獻表羞？

讀詩詠黃景仁

七十二般徒見窮，騰挪跳躍了無功。笑君稍遜洛溪子，尙在唐人魔掌中。

讀《戲答元珍》戲作

2015/1/22

無紅無綠未曾嗟，二月康州盡雪花。翻笑醉翁如女子，夷陵便哭是天涯。

自嘲中年增肥

2015/1/29

《梁書》卷十三《沈約傳》：（沈約）曰：「……永明末，出守東陽，意在止足……聖道聿興，謬逢嘉運，往志宿心，復成乖爽。……百日數旬，革帶常應移孔；以手握臂，率計月小半分。以此推算，豈能支久？」

人到中年夢漸涼，宿心亦似沈東陽。同知革帶應移孔，只是寬嚴各一廂。

戲人中年發福

髀肉增生脛肉橫，英雄老至萬難撐。笑君節食猶便腹，受得太多獅吼聲？

鄰松夜折寓意

2015/2/4

本以高標弄怪姿，邀風抱雪勢尤奇。可憐夜半攔腰折，辜負無窮頌美詩。

回國見聞錄幾則

2015/2/6

過海關

喝人如狗一微官，甫下飛機仰面看。可恨十年歸國意，海關未出已闌珊。

滬杭鐵路上

密封窗戶久蒙灰，乘務偷閑賣話梅。一側叨菸神氣客，剛從乍得打工回。

滬杭高速上

官要如弦自不歪，豪車天降放形骸。久盯道側難知處，出口全為限速牌。

夜出合肥長途汽車站

死拽行囊欲奪難，帥哥少弟叫成歡。恰如羊落狼群裏，一女鬆開一女攔。

嘉興市政府大樓

今日飛樓舊日田，停車場亦廣無邊。寥寥幾輛門旁豎，一隊官人正吸菸。

合肥城中搭坐軍車辦事

搭坐軍車事偶然，止行處處我為先。一堂動態人文課，識盡世間都怕權。

與國內教授共晚餐

學徒裙短溢風流，教授情多漫怨尤。酒過三巡雲霧後，科研於我又何求？

聖誕節前一天上班

乍進樓層覺冷清，一千屏幕兩三明。眾人俱已逍遙去，幾個蝦兵守大營。

詠雷三章

2015/2/27

乘飛機途中遭雷擊

大響無聲似觸山，機艙明暗一時間。老夫未有虧心事，如此天雷只等閑。

初雷

歲歲都期歲歲嘆，白光一掠便闌珊。有朝我若為天帝，教作連宵七彩看。

冬雷

作聲虺虺若撕天，觸手催春自認賢。萬紫千紅催不出，戚施卻得舞翩跹。

有感世界各地戰事

從教造化變無窮，蠻觸基因九九同。我料外星人到後，白黃黑盡屬沙蟲。

瀑布

瀑前紅綠意飛揚，各自將心擬短長。可惜歡情多似此，一朝傾瀉即冰涼。

初中諸君開同窗會因作

2015/9/13

初中凌君告余姊曰：“令弟，吾人所引以為豪也。雖不能至，必得近照。”余久思竟不記其人。因作。

自道多年未忘根，記中僅得幾人存。諸君重憶風華日，寂寞天邊月一痕。

有感於 Drexel Hamilton 股票分析公司

2015/9/14

初，Drexel Hamilton 公司稱某半導體藍籌股值 80 美元。未幾日，上調至 100 美元。市場暴漲，余愕然。又幾日，下調所有半導體行業股票，該公司僅值 70 元矣。半導體板塊暴跌，余愕然。昨夜，Drexel Hamilton 稱該分析師已離職，并撤銷所有半導體公司股票評估。余又愕然。不知周一股市又將作何反應也。

朝褒夕貶已無常，信口薰蕕臭與香。多少長身臺下立，偏從矮個問端詳。

時事有感三則

2015/9/15

夷蠻節旆滿皇都，肅烈三軍百代無。屢敕君王真革盡，如何臣腦又糊塗。

日照皇樓紫氣橫，數千驍勇寂無聲。觀兵獨缺徐元帥，諒已先行拔敵城。

未曾一統大中華，列國來朝缺幾家。長願驍驍諸將士，早屯東海與南沙。

告故人

2015/9/16

一自離鄉未近花，孤輪日夜向天涯。故人若問償心事，閱盡朝霞與晚霞。

忽得初中班主任電郵有感

2015/9/23

自余初中畢業，倏忽已二十六載矣。其間偶爾還鄉，幾年一度而已，與眾人遂無來往。今日忽得初中班主任顧老師電郵，附照片五張。感慨係之，因作。

久沉海外愧疏慵，徒感音書故意濃。遠晤屏前難解恨，終須對面睹君容。

日落

白沙依舊渺無邊，歲暮濤聲亦可憐。同樣夕陽同樣海，餘光畹晚勝當年。

五言律詩

夜宿擬古

荒村暗山裏，相擁共嶙峋。風急冷星落，海清殘月淪。行行臨別淚，歲歲欲歸人。所幸志雖滅，鄉心無一塵。

壬辰七夕

去鄉音訊遲，人道又佳期。皎皎金風照，迷迷浙雨思。欲家千里處，忽恐百年時。獨寐悲寒鵲，星河不我知。

八月

八月陰陽間，風平浪欲興。野芳縈蔓草，高木委攀藤。心傲絕書友，性閑疏酒朋。愁窮心復亂，長嘆愛成憎。

壬辰白露

白露無詩賦，風平夜未涼。蒹葭依水靜，鳥雀養羞忙。故地齊斟酒，斯人獨斷腸。即今狂詠去，何必待重陽。

九月

九月青黃接，高風染益秋。雁孤存戀去，枝折泣哀留。惻愴離人恨，連綿別夢愁。林林浮世事，漫漫伴天流。

壬辰重陽

獨執茱萸佩，登高夜色涼。草隨霜露白，風共菊花香。舊面成新面，他鄉作故鄉。
多情孤月照，無酒亦重陽。

桃花

桃花逐歲開，人面未曾回。笑貌思還亂，音容憶更哀。風悲吹葉去，香隕繞枝來。
誰料歡同愛，翻成淚共灰。

癡心

癡心非自慕，總被虛情誤。昔日似相愉，今朝唯見惡。文華可日新，容艷難長駐。
芳草連天齊，豈憂不得遇。

釣魚臺

大力夸娥氏，移山方外來。古今橫海客，往返釣魚臺。上國避三舍，東倭賤九垓。
莫令征虜日，四島動天哀。

夏日北卡州山中漂流

紅塵棄天外，孤筏夢中行。時沒怒濤迸，一浮驚鳥鳴。迂途生復滅，峭壁阻常傾。
歸憶雲興處，愁懷又已盈。

夫子華誕日作詩而嘆之

春秋久無道，木鐸一人持。數紀喪家狗，千年至聖師。獲麟終絕筆，候鳳獨傷時。
君子坦蕩蕩，何辭居九夷。

桂月寄人

桂月風漸起，木犀千里香。滿城歌朗夜，半數著兼裳。柚子黃間綠，農夫閑裏忙。願君多保重，一雨一場涼。

羈泊紐約詠懷

窮年名利苦，事雜不勝煩。木木砧鋼色，禽禽市井言。人奔疑作亂，車嘯若蒙冤。何日遺塵去，青山采紫萱。

歧路

經行斷山下，夜至益多歧。惡澗歌冤曲，枯松舞怪姿。客心殊已倦，歡夢復何辭。願得生六翮，搏空無所羈。

危路五首

危路此間分，遙望疑見君。洞邊雷打樹，山外火燒雲。屏息蕩低語，回身浮亂墳。一嗟天地黑，松葉落紛紛。

山搖助風抖，危路此間分。旗露松旁井，舟橫月下墳。幾熒明復滅，一嘯止猶聞。門壞扣不應，側身千丈雲。

日落猿聲起，摧藏不可聞。遠人何故至，危路此間分。往事生愁霧，離魂聚暗雲。夜來憐月冷，更照雪紛紛。

孤行亂山裏，松轉鬼聲聞。躡足落梯石，低眉搖棧雲。迷途何日盡，危路此間分。浮世如逆旅，南柯聊暫欣。

極目秋蕭瑟，寒空雁失群。逆風唯咽咽，落木復紛紛。荒冢蔓枯草，殘碑駁蘚紋。樂鄉何處是，危路此間分。

壬辰寒露懷友

寒露侵晨至，溫情緣夢尋。懷風送秋水，憑梓寄孤吟。落葉離人意，空山故友心。一朝曾促膝，萬里是知音。

剝王維

終南通捷徑，隱在輞川邊。去意堅如水，禪心閑若鳶。祿凭奸定奪，官與賊周旋。所懼唯何事，無人頌我賢。

登樓賦集字十首

予幼時好讀登樓賦。近日臺風肆虐，交通中斷，困於紐黑文。百無聊賴，因效東坡集字歸去來，綴詩十首，然愧不得兒曹誦之。壬辰陽月，洛溪狂客筆。

盤桓於顧憂，淒愴以登樓。華實盈平陸，隰皋臨沃流。憑軒陶野遠，騁目楚天幽。信美非吾土，歸歟何足留。

步遲悲未暇，信美寡登臨。無意於莊顯，有懷將越吟。瓜懸莫其顧，涕墜弗之禁。舊土今遙隔，人窮豈異心。

日下其將匿，登高望楚荆。逶迤幽路迴，蕭瑟舊原平。懼寡獸狂顧，求群鳥慘鳴。人心何闐闐，孰可並吾行？

邁邁曾逾紀，登樓嘆逝川。越吟惟惻惻，楚奏實懸懸。鄉遠山河隔，行遲道路遷。今歸任吾臆，何暇涕高天。

日月遭紛濁，歸心夜夜同。河清長可俟，天遠未曾通。背浦悲川逝，臨皋嘆道窮。昔人今不在，徒倚望高風。

日夜交相逝，憂心長在斯。懷歸情眷眷，望鳥意遲遲。莊舄雖高顯，越鄉徒遠而。吾今感無翼，倚檻悵何之。

登樓聊極目，北向涕昭王。氣宇橫天在，風儀蔽日長。深川通白土，迴路接何鄉？吾道雖彌寡，心清不以狂。

登階窮目力，漳濁野聊蕭。井渫心長憤，瓜懸憂未銷。歸歟音惻惻，尼父意昭昭。何日步鄉路，憑望楚夜遙？

不寐登茲宇，天幽楚月高。開襟望北冀，側目覽西皋。道寡悲無假，情懸畏所遭。心雖在陳力，紛濁意忉忉。

栖栖望征鳥，嘆息一吟徒。鄉遠情今昔，岑高日有無。悲懷感留牧，少力信非夫。窮達豈憑道，濁清惟在吾。

胡錦濤全退而書事

幾載守邊臣，十年韜晦身。求諧終逐末，反腐只勞神。不意爭功過，超然去垢塵。一筐中外事，可付後來人。

陋室吟

久客忘其貧，蝸居陋室親。無簾光易借，有洞氣常新。褥少假書緊，歡多夢筆頻。芬香盈四壁，何必卜芳鄰？

赴美十七周年作二首

躊躇一少年，遠渡慕時賢。揮手親人淚，擡頭異國天。青春書內盡，素志鬢邊湮。將寢感明月，牀前為我圓。

獨有洛溪子，飄零在異鄉。終年效夸父，亂髮逐斜陽。失道迎風哭，臨歧舞杖狂。
誰堪垂暮下，萬里斷中腸。

夢遊廣寒

執手月光寒，淒容且笑看。卿懷千里苦，我惜一宵歡。舞袖星方璨，停杯夢欲殘。
暫隨莊蝶去，淚下莫闌干。

哀良馬

從來天上馬，折翼墮青雲。才逸人皆恨，身清自作群。空懷遠方志，枉陷俗塵紛。
引頸歸無處，悲鳴不可聞。

癸巳端午節於紐黑文作

端陽空自至，四顧雨霏霏。久客猶難已，初心未忍違。風狂憐草倦，天暗覺燈微。
誰道不相憶，離魂夜夜歸。

訪舊

訪舊總心酸，矧茲羈影單。親交何處去，景物夢中看。殘菊情猶在，秋蛩意正寒。
將行還獨立，回望夕漫漫。

詠石

一介獨炎涼，無求性自剛。偏由芳草秀，豈任逆風狂？雨驟聲翻壯，苔侵色益蒼。
中心當磊落，有角又何妨？

踏山見一橙色樹於眾綠之中感而賦詩

漫山唯弄綠，橙色自成群。遠望驚林火，近觀疑日曛。孤芳強似我，生意更輸君。
臨別三擊掌，相期看白雲。

地鐵五味

地鐵五衝氣，言來話卻長。阿三臭難狀，老墨辣能當。屎尿野人穢，胭脂美女香。
此中餘一味，遊子內心藏。

曼哈頓島晤故人沈君并送別

2013年8月2日，高中同窗沈君畢業二十一年後特適曼哈頓島，攜子短暫晤我，感而賦詩。

同學三年後，浮雲廿載餘。美姬矜有嗣，孤客愧無廬。聚散緣雖淺，悲歡契未疏。
臨街相擁去，人海獨茫如。

裸官

單身赴異鄉，兩袖與天長。烏眼隨時綠，紅心到處黃。九州無子女，四海有銀行。
反腐夫何懼，須防小妾狂。

油歌

2013/8

啓功先生說，漢詩是長出來的，唐詩是嚷出來的，宋詩是想出來的，洛溪遊子的詩是痒出來的。

漢詩如草長，嫩綠雜金黃。唐士放聲嚷，佳音猶繞梁。宋儒搜腹想，謬理讓人狂。
遊子一心痒，油歌萬首強。

獨步紐約中央公園

高樓三萬尺，四顧密成圍。應是風難起，徒令葉不飛。殘陽憐久客，寒袖籠余暉。
雖乏搏雲力，中心未敢違。

客中自題

浮年三十八，廿四在他鄉。漢土頻游遠，胡鬚日理長。閑來誘西女，夢去撞南牆。
已慣無人愛，歪詩自個涼。

秋遊落基山國家公園

雲崖起暮烟，石蹬入秋天。隼息冰川下，羊偎瀑布前。連峰沉落日，去國嘆經年。
更恐雙親憶，魂飛不可牽。

懶覺寓嘆

頭昏眼也迷，窺日正沉西。形類貪眠狗，心慚報曉雞。一宵徒有興，百慮尚無題。
老至詩才澀，非關得少妻。

送學生歸國

奇劍肯久匿？十年勤自磨。壯懷欣抖擻，別意敢蹉跎？雲水望中急，風雷去後多。
此行無所贈，為鼓大鵬歌！

讀《悲憤詩》有感

字句何其拙！逾知泣血為。百嗟方卒讀，十日尚餘悲。腸已罹兵斷，肝猶別孺錐。
今人多不喜，癡愛我同誰？

書歸有懷

壬辰中，余與女友自康州出發，歷時三日，行程兩千英里，將十數箱書從喬州前妻處載回。近日思及舊事，因作此詩。

山水笑相催，飈輪殷似雷。半生隨夢去，此日載書回。重識芸香鬱，兼蒙粉色陪。陋齋雖雜亂，正可縱情堆。

甲午七夕感作

牛女遙相隔，光猶十六春。長天星脈脈，異國恨殷殷。路慣單程路，人知夾縫人。舉頭唯玩月，清漢已傷神。

耶魯大學 Phelps 門前晤別高中班主任王老師之波士頓

三載丁寧後，相違二十年。感君炎日下，期我古門前。肺腑方聯袂，風塵又著鞭。遙知晨讀處，眾木已參天。

周獲魯獎有感二首

意俗復聾牙，平平卻自夸。毫儒睜著眼，禿筆指成花。從此銜金桂，任君稱大家。只憐香案下，所進遠非茶。

周郎呈妙物，絕倒老蒙童。自道凌唐士，誰知運秘功？詩文今不議，品行舊來空。竊印諸般事，難逃佞傳中。

有蜚

2014/8/24

有蜚乘霧幕，高據桂枝顛。鼓腹黑還厚，團丸臭且堅。分明貪食溷，竟爾妄稱蟬。
總見書蟲拜，迷其所以然。

有蔦

有蔦趨炎熱，心高不晒泥。乘雲卑巨木，假日藐連畦。正午莖蜷北，將昏葉轉西。
忽如霜夜至，根死影淒迷。

有鰐

扶南充獄史，罪否飽飢分。牙利稱將戒，皮粗笑更韃。噬人偏灑淚，欺世屢銘勛。
欲挽射潮弩，官申有祭文。

贈韓國同事殷教授

2014/8/22

教授喜摩詰詩，曾與論《史記 宋微子世家》，內載武王封殷箕子於朝鮮事。於宗教，文學，音樂，歷史，地理，金融，無一不通。相談甚歡。

海外持希姓，名隨箕子崇。顏形如漢裔，舉止有唐風。壁上渭城曲，胸中太史公。
他朝重煮酒，所見定仍同。

聖誕夜回康州火車中作

2014/12/30

聖誕客中至，風情舊已諳。彩燈奔似錦，迴漢舞逾藍。車沸多歡笑，心馳賽逸驂。
火鍋逢美酒，想見合家酣。

夢後作

2014/12/24

魔王指我嗔，欲醒夢中身。狂笑釣鰲客，竟成騎虎人。天邊捐二稚，海外泣雙親。聞此忽驚起，牆隈獨失神。

贈某學弟

2015/1/3

大智數曾逢，遲疑如稚孺。一絲存戰兢，三復恐差誤。無有四時功，難行千里路。莫師荷上蛙，能縱不能步。

2015 年年首自題

2015/1/6

昔負家鄉土，衝天出洛溪。為酬千里志，不作一枝栖。率性終無悔，孤飛卻轉迷。壯心君莫問，仍與別時齊。

思張益唐事感作

2015/1/8

張益唐博士畢業後，屈居美國某大學作一講師。生活拮据，送過外賣，做過業餘會計師，據稱常在校園裏撿拾菸蒂吸食。忽發表孿生素數存在性一文，震驚全球數學界。數學奇才 Terrance Tao 稱，張的證明思路并非另辟蹊徑，而是沿用了已經存在的方法。數論界所有權威都認為此路已是死路一條。張堅持這個方法數年，終於打破缺口，證明了這個重大猜想。張已獲國際數個大獎，也連昇多級被提拔為正教授，成為傳奇人物。

聞訊數驚嘆，迤邐一講師。乃知成大事，所貴在堅持。雲氣萬重後，風雷突作時。楷模長警我，勤勉奮天資。

憶同學中棄家室及博士學位而出家者

2015/1/17

世事塞心胸，憂煩幾萬重。三餐多白飯，四季一清容。忽與眾人別，但云他日逢。十年音訊渺，遊講到何峰？

與博士生時同學曹張二君宴於時代廣場

2015/1/17

男兒相誓後，南北復東西。今夜歡須盡，當年勇莫提。無人操舊業，有酒賀新妻。解帶酣歌處，浮名早作泥。

戲同事喻君娶鋼琴老師

2015/1/27

美人挪素手，傳曲復移情。遂使叨花客，轉迷流水鳴。眾看衣漸緩，自恨技難精。司馬關關意，琴中卻已盈。

康州寒舍寫興二首

2015/1/28

貧居多蘚痕，幾雀伴晨昏。犬吠因風過，花明在路存。枕詩觀日色，隨蟻繞牆根。懶甚無心怨，桃源未得門。

風雨竟從容？緣藏樂者蹤。依山三尺路，去海數分鍾。有徑皆生草，無窗不見松。經年檐下雀，一客未曾逢。

醉意

2015/2/3

我浮東海上，星餌漢為竿。歲月忽千載，乾坤只一丸。醉時何稱意，覺後了無歡。
僂事安能偶？徒嗟世路難。

炒股兩首

2015/9/12

恆遭納綺羞，憤懣一黔婁。竟卷桐棺蓄，專從股海遊。胸中無拙策，水底遍神鈎。
彈鋏咨天帝，胡然目我讐？

夜半繞牀呼，營營一病徒。鼠標充玉磬，電腦作丹爐。天運諱人測，山頽欲手扶。
煩君莫催問，功力進階無？

秋葉

2015/9/20

苦待得高風，青春旅夢中。翻飛招鳥羨，流彩染霜紅。落落離根本，欣欣向遠空。
此生求絢爛，不與俗枝同。

遊 Hammonasset 海灘州立公園

2015/9/29

閑步白沙外，輕吟碧海邊。花香何鬱烈，果色亦嬌妍。飛鳥偕雲戲，遊人對日眠。
此間堪久逗，平樂勝堯天。

客中秋雨有懷

2015/10/4

夜賡秋興篇，鬱鬱至無眠。誰奈三更雨，偏尋十月天。風寒摧苦志，水急劫流年。令我思陶子，斯人不乞錢。

夜讀賈島《送別》

2015/10/8

牙弦孰嗣音？遊子夜沉吟。因見山中玉，如聞海上琴。冰盤昇澗谷，清照滿霜林。一曲千秋意，云何不濕襟？

得故人書

2015/10/11

故人魚信至，苦我徙連仍。一自風中別，幾如天外鵬。江南初桂葉，塞北已霜棱。末囑無多字，吳莼正上乘。

周一六時未至起赴紐約上班火車中作

2015/10/12

夢中鈴大作，女曰匪蠅聲。拭目人猶困，窺簾漢正橫。嬌兒慵抱枕，慈母細調羹。風雨妻迎送，多年未誤程。

題格那丁

支足已忘年，掀牀自化僊。目空浮象外，名播越詩前。相士多如溷，窮幽徑說弦。永號殊寂寞，知我但諸天。

題鏡山

吟心非小可，膏火苦相煎。興發髮先擲，情狂股亦顛。硯蟾寒自慰，詩槩豎同眠。
詠罷霖潦泛，媧娥正補天。

六言律詩

心鬼

寒鴉噤悸黃昏，厲鬼縱橫暗村。血濺前山後水，屍陳古墓新墩。一聲耳際尖叫，十個心中怨魂。早覺餘生半冷，還將剩酒重溫。

七言律詩

次長征韻二首

時危不怕建軍難，萬里長征只等閑。霧鎖井岡星火暖，雲圍遵義號聲寒。復興古國
凭鮮血，韜略全球賴小丸。戎馬一生成偉業，神州百姓始開顏。

百年魔怪豈稱難，三座大山只等閑。賞雨南湖舟上客，揮師北野掌中丸。檄平紫禁
春風暖，橫渡長江殺氣寒。星火燎原天地煥，為民服務始開顏。

壬辰國難日懷岳武穆王

六狄交侵百恨生，十年磨劍一朝成。任他魑魅狂和暴，還我河山徂且征。報國功期
擒兀術，安民志在搗龍城。三軍不敵莫須有，萬古同悲五岳盟。

壬辰中秋夜詠懷

秋高氣爽海中天，雲淡星稀思萬千。十載寒窗雙冷袖，百年獨客一危舷。風淹此夜
由來細，月滯他鄉分外圓。輕浪粼粼人蕩漾，無眠應在聳詩肩。

華爾街

印地荷皮多少秋，米旗星幟一金牛。梧桐風雨牆難覓，財閥興衰水自流。三典冗長
明法律，五銖微小控寰球。樓危不及熏天欲，心靜何須泛海舟。

曼哈頓島

千載卷舒雲戲澤，一朝風定涌新城。三州月繞存林色，二水人行化浪聲。樓割曉昏常變幻，人忙聚散各經營。榮華富貴非吾願，別夢依稀浙雨情。

遊聖胡安原始雨林

潛林吐霧重霄蔽，飛道盤空萬澗回。忽雨忽晴無定數，疑仙疑鬼有驚雷。纔憐蜂鳥依人囀，又詫曇花傍石偎。恬臥行將化莊蝶，無情響笛却相催。

一千三百年華誕詠杜工部

少小清狂豈事耕？山河破碎客中征。百年沉鬱丹心嘔，萬丈光芒詩史成。字俗偏能擎秀句，律嚴不累縱豪聲。道章千首堪垂世，民瘼時艱血淚橫。

和紅塵邊上客《壬辰仲秋山居有賦》

奇才曠世謝塵羈，野逸山居俏女兒。情至繡絲丹鳳羽，閑來釣澤白羊皮。雨中清角悲師曠，月下孤琴候子期。莫道此生唯一己，知音夜半和君詩。

注：

原玉：道德文章兩不羈，合該前世是男兒。才情傲比千金骨，身價慚同五羖皮。海角無心尋伯樂，天涯有淚弔鍾期。人生若問舒懷事，將謂知音和我詩。

壬辰中秋夜紐黑文遙思故里海寧潮詠懷

夜永天涼睡思遲，彷徨自問欲何之。渾圓月挂嬋娟處，一綫潮奔洶涌時。猶記江邊齊曠爽，會當世上競驅馳。別來蒹葭年年蔓，恰似羈愁歲歲滋。

壬辰初度歌

少年仗氣異邦遊，苦辣酸甜二十秋。心鈍不能分諂慢，身微哪得歷沉浮。懷情愈覺親交遠，矢志方哀歲月流。幸有良詩三百帙，時時朗詠慰鄉愁。

詠韋應物

明皇仗裏放狂兒，曉玩樗蒲暮竊姬。心鈍若鍾無片字，恩深似海有窮期。杜門斂性終賢守，折節從文竟妙辭。王孟弗如追太白，淵明素樸乃宗師。

自嘲詩

本探物理欲齊賢，半道謫詩太可憐。縱筆幾忘多少載，恣情一數萬餘篇。人云生硬渾難讀，自覺輕浮豈足傳。乃識文章千古事，無才有字亦徒然。

詠謫仙人

謫降仙人抱酒生，逸才作劍任縱橫。訪山不忘求靈藥，修道還期比老彭。壯志搏雲猶自涌，華章馭氣只天成。大鵬一曲遺塵去，萬世餘風蕩雅聲。

詠李長吉

誰憐病客褐衣寒，夢斷長空瘦骨單。兩鬢吳霜先死易，一山蜀鳥欲歸難。黃風泣草頽雲落，白馬悲秋晚笛殘。天既無情天不老，愁君獨自淚闌干。

登高

漫天夕色望無窮，遠阜招邀共向東。漾漾波搖秋海醉，飄飄葉舞晚風紅。忘機美景誰相伴？束楚良緣曲不終。鬢白今生方識字，人間愛恨一蒙童。

譏王維

白水青山萬里關，詠完自得畫紅顏。塞歌半有高岑壯，林賦毫無韋孟閑。別業連薨身謂隱，奸臣當道俸狂攀。詩編上半還堪讀，下半可呈安祿山。

詠王之渙

藍衫滅裂作潛夫，卻笑高王田舍奴。倜儻異才懷亮節，躊躇大略屈雄圖。黃河遠唱涼州曲，鸛雀更思新絳儒。瓊玉原應天闕有，止遺人世六驪珠。

感恩節賦得

慣於半夜望星辰，萬里愁雲恨殺人。無奈光纏無奈月，不堪影附不堪身。閉門且盡杯中物，開卷翻憐陌上塵。幸得群詩相鬪艷，冬來聊贈一方春。

戲韓愈

詩作散文非自戲，橫求樹立弄天真。囊頭滾土祈餘齒，露體撩雲咒逝春。未老恫憂逾紀嘆，偶遷忿懣累篇申。可憐一己錙銖計，萬字新奇意味陳。

憶大學生涯

學習之餘唯學習，清華北大等閑看。修心寢室蟲為患，勵志澡堂冬亦寒。逃課攻書偏有效，通宵備考最生歡。五年所恨誠何事，師妹稀奇一會難。

憶童年

小時生長在荒澤，天性調皮事不經。逆泳嚇獸新舵手，亂登氣壞老船丁。攀桐數墮得金蛋，掘壩無休盼寶瓶。今日童心應未泯，只憐客裏正飄零。

自紐約之紐黑文列車中逢雨戲作

晝眠乍覺客心驚，造化無端正鬪兵。擊地陣雷聲暴躁，吞天戰霧貌猙獰。狂風卷浪恣情涌，豪雨翻江任意傾。所喜須臾塵盡洗，一虹高挂賀雙贏。

文憑

人家十載我一晨，博士誰說最耗神。名校唯唯將隊列，秘書振振把詞陳。課時不到自然有，答辯無需領導申。莫道丟光中外臉，刁哥亦是我同人。

佚題

分明萬里更銷魂，且月栖栖孰與論。善惡終須歸業果，死生何似鼓莊盆。赤旌已浸天街血，古國平添地獄門。東望故園無所見，晨開只道正黃昏。

康州六月雨如冤，悱惻迷離久不翻。天上災星予作客，人間禍水孰為源？忍看赤膽書生血，敢指紫衣屠伯藩。此恨偏多消未得，小庭苦覓了無萱。

元凶

獨立寒秋直到冬，湘江誰睬舊時容。天如有命天當死，地本無槍地亦從。牛鬼蛇神成絕唱，張三李四作元凶。書生隔海又何事，霧裏看花億萬重。

天問

一夢白雞天下素，可知赤縣遠紅歌？整風又見歪風遍，革命爭如宿命何？盛世十年曾恨短，順民萬億轉嫌多？湘潭日暮遙相問，龍冢迷離水不波。

血同源

根紅苗正血同源，鼠輩商歌只浪喧。三講一諧何少習，十兒九害不多冤。造邦事畢犬臨鑊，革命功成鶴入軒。君看長征窮苦地，舊時星火會燎原。

造詩記

禿筆難明禿頂癡，閉門自鎖造奇詩。定時器響知才盡，碎紙機停覺恨遲。怒斫玻璃聊一快，恍聞坦克又群馳。陋夷能有幾多事，且看庸人亂擾之。

劫

莫名地下九頭鳥，昏臥身旁十幾春。性太天真應有得，世誠穢惡只難陳。千叮萬囑流星雨，陰錯陽差失魄人。心事如灰俱已矣，來生還願作微塵。

適芝加哥迎江郎訪美

域外忽聞尊客至，驅車詣邸不辭疲。衝天藏獨同臺獨，滿地黃旗與赤旗。烈日劈頭無限渴，神龍藏尾有些疑。此行只壯華人氣，豈羨高官擇另枝。

露水

奉盤僊子淚難枯，墜入梧桐潤氣殊。秋晚蕭條雖自愛，風搖滴瀝怎相扶？猶如奔月嫦娥恨，更似報恩泉客珠！來也晶瑩去高潔，憐君警我一塵無。

四外當於漢語強

四外當於漢語強！老夫突發少年狂。西班牙去如歸國，小舌音來似鼓簧！初覺課文真可愛，漸知詞法很悲傷。一周更曬六天網，要泡洋妞路尚長。

鑒湖女俠頌

祖國鼾眠萬事輕，隻身求學赴東瀛。秋風秋雨家園恨，寶劍寶刀豪俠情。陋習籲除聲不絕，金甌誓補血全傾。丹心更比男兒烈，反帝平權第一英。

讀史

普天封國不朝周，率土流氓盡服劉。眾史從來明且易，諸君何必怨而尤。無非世胄成姦宄，或是英才作死囚。獨有多情陳伯玉，幽州臺上涕難休。

贈某論壇評詩達人

可憐食腐九頭鳥，寧做論詩三腳貓。連吐帶噴傾狗血，只評不寫耍花招。胡言自是水平次，惡意權當腺素飆。怪叫如癩脾氣倔，為驢為馬豈需瞧？

癸巳處暑自題

客裏糊塗又到秋，喬州負我徙康州。廿年家產全盤棄，滿腹哀傷一瞬流。人道妖姬情易縱，誰云遊子恨難收？此身自忖多長處，高富帥加詩賦尤。

詠賈長江

又愛春來又愛秋，誰云只與老僧遊？微吟惹鳥依人囀，逸步飛花伴澗流。已悟空門思致力，豈因病鵲肯低頭？可嘆後世多無識，鄙俗寒酸噪不休。

梧桐

嘉木曾言為爾栽，栽時祖父尙無孩。春歸綠葉隨風舞，夏至黃花帶日開。甘子皆云賽紅豆，焦枝不廢作琴材。若逢月好平安夜，會有天邊彩鳳來。

剝紀昀

古來一候無多日，此賊單槍要八妻。織罪毀書貪殺吏，求榮媚虜相風雞。可悲筆記千般改，難與聊齋半頁齊。恬臉更譏唐士俗，我批狗眼看人低。

也說詩賽

秋興無窮笑廣騷，文通詩霸逞英豪。狀元都料囊中物，花榜群掀海上濤。彼道絕非吾道是，我山遠比你山高。至今耿耿懸崖下，夜半時聞鬼怒號。

登紐黑文 East Rock 望海有感新舊兩首

危崖騁望問如何？思緒遼於萬里波。歲月無情須振奮，江湖有憾敢蹉跎？枉離神國時偏久，誤入詩鄉樂反多。別後東巖幽不語，雲間聽我大鵬歌。

危崖騁望問如何？暮色蒼茫萬頃波。處處山林爭畹晚，時時蟲鳥共蹉跎。心空翻惡鮮花艷，客久偏憐老樹多。倦臥苔巖雲不語，松風來和紫芝歌。

貪官與民工兩首用同韻

民膏刮盡是專家，貪欲湯湯未可涯。海外銀行貯公款，國中金屋聚嬌娃。貞廉入土澆堆尿，雞犬昇天帶只蛙。縱使今生名不敗，永淪阿鼻卻須嗟。

莫笑人窮不愛家，愛家才要闖天涯。藏滇築路川湘漢，江浙縫衣皖贛娃。建厦互嘲雲外鶴，擠牀獨羨井中蛙。心胸坦蕩身瀟灑，回首崢嶸豈用嗟。

發表科研論文有感

嘔心瀝血問誰憐？有去無回又一篇。央懇主編難見效，獲聞初審已經年。滿腔美願身三沐，整頁胡謔臟百煎。淚諫後來諸小子，須師學霸莫師賢！

酬紅塵邊上客《臨屏贈羈旅紐約 M 君》

窮村牛犢竟畱洋，諾獎區區信有方。實驗室幽驚勝地，圖書館美作僊鄉。三生難報恩師誨，一介應成末路霜。更愧紅塵邊上客，頻頻跂足夢中望。

注：

原玉：駸駸蓬矢下西洋，弱冠離家志四方。十丈烏雲隨出國，廿年明月照思鄉。故人偶託三更夢，倦客平添兩鬢霜。萬里歸心懸兩地，雁天鯨海渺相望。

三江歌

野老何辜拈此韻，三平請怪嘉陵江。紅歌一斷失吞鳥，禿筆難搖欲斲窗。刮肚頸聯才半句，憑心腐罪過千椿。忽聞東魯懸河辯，四腳朝天敢不降？

挈燈人 - 向葉嘉瑩老師致敬

未許斯文棄且淪，楓鄉鯤島漫征塵。榮光赫赫宗師譽，舉止謙謙君子身。數紀講壇弘國粹，幾堆錄像作家珍。耄年難息平生志，猶挈明燈引後人。

憶高中生涯

年少輕狂不用功，頻抄作業借東風。答題故逗全班樂，開卷明知整頁紅。隨意引吭教研室，存心舞劍女兒叢。離鄉若問思何處，還數城南第一中。

補作癸巳初度歌

孤筱青青每自夸，年將不惑竟開花。一叢斑葉千行淚，半截枯枝十個疤。豈忘初心化嘉木？且拼餘力孕靈芽。請君看取三秋後，碩果累累領物華。

此女

環肥燕瘦欠妖嬈，此女芳心最會撩。該凸該凹皆有致，時顰時笑漫生嬌。玉簫哀樂傳神弄，水墨淺深隨意描。若遇隋煬定封後，運河修到廣州橋。

夜望星空

炸破洪荒百億秋，一秋豈止萬千愁？幾番逐鹿臨參井，何處乘槎到斗牛？盤古莫非歸黑洞，嫦娥或許見神舟。晶瑩最是天琴座，賸有佳人淚未收。

老父種菜除害二首

家父赴美探親，開畦種菜，其樂融融。唯有蟲害，螞蟻、千足蟲，等等，不一而足。久治不平，又以蜉蝣（一種無殼蝸牛）之害為最劇。晨昏察之，日誅數十。

2014/07/08

老父種菜歌

誰憐越北弄泥翁，徑渡西洋育白菰。斷樗作籬森似槩，壘磚成陌宛如宮。甫耘沙地嘆貧瘠，忽笑草坪爭鬱葱。從此絕緣超市菜，質鮮味美豈能同？

老父除害歌

癡頑誰似白頭翁，晝夜謀誅竊菜蟲。藜杖剛哉刑馬陸，鑊湯沸矣灌蜈蚣。槐檀國破魂歸後，蠻觸家亡戰亂中。更笑書生原不解，與天搏鬪樂無窮。

學詩二首

唐社張公出題，限一東八庚。諸子踊躍，余不敢不從焉。屢思無句。中夜不寐，遂起讀書，并援筆作詩。詩成，河漢已橫陳矣。-- 2014/07/09

詩共羈身四海征，一年一帙紀心程。未知誰愛情無奈，總笑人愚志不更。雜取時呼天地廣，薄收每見斗牛橫。性狂豈屑吟風月，要繼青蓮縱雅聲！

指顧名家假大空，由來狷介一詩童。忽悲忽喜推敲後，隨寫隨刪放任中。禿筆直衝情似泄，俗人怒罵句方工。朝賢可嚮西天望，小子無師已自通。

憶恩師

2014/7/23

袖裸頭蓬眼欲枯，敲門乍見若逢愚。兩廂半是巴丁物，四壁無非費曼圖。超導超流俱已解，星雲星系更何殊？此生難忘恩師誨，劣質偏偏奮力扶。

治國數字歌

2014/7/11

毛爺萬歲一時香，兩個新貓狠更強。五講名歸三代表，八榮實至九中央。百家齊放無殊議，四項堅持有永康。畢竟諸皇精算術，拈來數字是文章。

登高感秋

涼風詐我此登臨，四顧惟秋轉恨今。滯水嚮雲雲嚮雁，赭山披鐵鐵披侵。眉間路斷無芳草，足下蟲寒有怯音。似憫憂傷銷不得，殘陽送暖結同心。

補作遊圓明園

2014/7/13

聖朝自詡是天開，天若真知駭且哀。珠閣玉書煙裏去，觚棱金爵土中來。風柔仿佛聞娛謔，日暮分明見駁苔。與國歡心終未得，可憐多少草民財！

感舊四首

來時仿佛去朦朧，愛恨依稀似夢中。西子湖邊摠弱柳，宙斯城上沐東風。老忠泉嘆千溪綠。大霧山驚萬木葱。未醒新人成故事，十年春意一朝空。

時空錯亂最傷神，眼鏡湖邊四月春。慢候光陰創或合，獨翻相冊意難真。當年執手追花雨，異國差肩遜路人。天地玄機原易悟，苦參無緒是紅塵。

夜讀驚來笑靨姬，何由搭訕至今疑。芳名真合珊珊骨，薄綺還憐楚楚姿。我立花前難解意，君傷月下每違期。此生盡誤書堆裏，總是茶涼始覺知。

曼舞雖終意未闌，詢名錯愕又珊珊。長談偏記香閨暖，漫步猶憐玉臂寒。越客情開真墮網，吳姬年少只偷歡。清純舊照安然在，每憶韶華一歎看。

訪官寺兩首

2014/8/18

一望連薨若帝宮，龍涎繚繞梵聲中。沙彌歡喜延香轂，檀越摩登議大雄。總見客遭諸相累，竟無僧解萬緣空。六根寂靜恁難得，鄰女歸來看更紅。

出胎持素可憐蟲，眞法緣慳恨未通。有意天涯尋覺樹，無由身內制心鴻。參玄時歎人綱毀，禮佛低聞汝道窮。官寺回望唯俗骨，蓮華卻在絳雲中。

煤山詞

2014/8/18

眾口喧騰德已孤，蠅營此日到窮途。群趨汲汲朝廷黨，誰見錚錚里巷夫？國祚維艱虛一死，權閹雖戮控千都。遊魂餘孽滋天下，斗粟蒸民識得無？

甲午立秋作

眾芳雨後十分迷，三在枝梢七在泥。暑氣猶懸紅日上，涼風已過碧山西。時逢鵲渡歡難盡，客賦秋聲色轉淒。似慰他鄉無和者，蟬鳴遠近又高低。

讀杜老《秋興八首》有感

久淹漸識故園心，捧玉江干悟雅音。去國頻成開府賦，感時獨敞仲宣襟。似聞砧急舟如泣，未忍楓凋夜欲臨。回首京華同濺淚，戎車裘馬恨交侵。

讀國詩賽行卷贈扁舟詩友

祇知世絕性情人，一葉居然守樸淳。獨踏鯨波歌寂寞，回望欲界嘆沉淪。千狐蒲氏文偏古，八米盧郎淚不眞。可否我隨風去後，也捐兩滴浥黃塵？

讀國詩賽行卷戲贈羅衷美

2014/8/31

注：贈羅君詩前六聯可與羅君“五星紅旗”，“佳人”，“夫子廟”，“遊泳”，“太空行”，“平居即事”六首詩同看。

紅日照旗紅又紅，佳人旗側哭歪風。廟前聖哲煙花裏，皮下脂肪火焰中。超載才華追黑洞，嘯天歌體有跟蟲。三年一別猶原地，刮目觀君十駕功。

讀國詩賽行卷戲贈顧青翎

顧子迷丹方半轉，群童已贊九牛毛。能翻國賊為高士，獨據邱園類土豪。富少虛張遺老像，南皮勝似北邙騷。誰知眾鬼偏持素，驚看真人啃剩螯。

讀國詩賽行卷戲贈韋散木兄

性同小寶姓同韋，卅載守真心事違。情繫關關春亂涌，竇開袞袞涕交揮。包廩總惹徐娘誘，擊鐸徒驚阮婦飛。高宴曲江難稱意，終須熊攬二喬歸。

憶幼時與父並肩搖櫓夜行作

2014/9/4

高低趁拍未容停，夜氣清舒櫓亦冷。入夢漁村無火燭，繞人衣角有金螢。岸邊蘆影連天看，腳底舟聲和水聽。近問何年何處去，笑云只記滿河星。

風花雪月四章·風

鯤亡鳩亦躡扶搖，勁掃甘棠已盡凋。不見袁宏舞仁扇，再無王粲泣幽寥。士氓草偃周公懼，卿佐尸陳漢祖驕。苹末非雌歸肉食，紅旗獵獵彩旗飄。

恭祝 52 詩友新春快樂

2015/1/7

余至吾愛，倏忽近二載矣。每與詩友神交，如得藍田暖玉，誠人生之大快事。然余生性憊懶，疏於酬答，愧莫深焉。今於紐約恭祝眾詩友新春快樂。事先發表，以免彼時沒於詩海之中矣。

網上華章亦起煙，尋珠豈必赴藍田。欣逢眾友銀屏裏，早忘孤身碧海邊。平日寡酬慚陋習，今朝贖罪祝新年。合家歡樂還安健，詩意人生每一天。

康州冬日雜詠

2015/1/13

寒冬亦有景如屏，尋勝何須滿目青。試探後山冰峭峭，和吟前澗水泠泠。雪光常轉隨雲舞，草色雖疏誘鳥停。若待夜闌霜盡落，擡頭可見最遙星。

甲午不惑年初度歌

2015/1/23

疏冷無心陟嘯臺，陰晴臥看掌紋猜。青春今日真長往，玄宅他鄉屬未來。愁坐蝶魂潘鬢色，窮應蓬梗越吟才。江郎爭那從茲老，逢客唯矜得異孩。

刪詩戲作

2015/1/30

鼠標如鋤放狂開，心血當時盡化埃。豈是諸卿稍有過？應慚某乙太無才。於今暫請別詩集，不日須能至夜臺。見得青蓮論劍後，還魂入我夢中來。

美女效萬楚

靚姬靚靚靚如何？靚較古今中外多。輕墜薄衣時蕩漾，緩行急走總婆娑。春山有意爭噴火，怒海無由罷弄波。莫是嫦娥知見絀，鐵心不願世間過？

於紐約大學代課

2015/2/5

睽違師道已多年，誰料今生又執鞭。容異客星天外覩，興高雲嶼海中懸。他時自悼充牛後，此夕群瞻立馬前。歸寢偶然驚歲月，舊徒四散不成眠。

偶作

2015/2/9

早將半截付冥冥，沉得妻言入老齡。髮白空懷興國策，心灰轉愛倒頭經。眾蠅氣絕風中磔，幾虎屍陳板上釘。夢裏隨人呼萬歲，王孫執鉞笑傳停。

代妻

2015/2/11

君似終風噎且霾，偶因聞噓惠然來。水中抱柱須無恨，山麓藏嬌最可哀。日射澗花紅欲并，夜纏巖雨斷難開。願言每使蘭心瘁，自譴緣何拾棄孩。

有感中國近現代歷史

2015/2/20

海門棄守陸疆淪，季世悲哀不可陳。終見虜庭亡玉璽，首逢禹域委倭人。閱牆誰替生靈計，問鼎都言主義真。蠅虎無邊猖獗日，先驅遺志已全伸？

語紐約

誑我今生共白頭，荒唐苟且四春秋。豈憐偃蹇居蝸室，每忍逍遙起鶴樓。侵曉呼來真似畜，及昏揮去不如讐。嗟君此等無情分，唯有尋機一紙休。

金正恩

聖朝豈有洊飢年，粉面油頭只衍然。一姓江山蔭莫莫，三軍渠帥腹便便。像多不懼無人拜，影抖須悲眾婢妍。簪筆近臣工語錄，可知朝夕赴幽泉？

弔黃公公度

夢裏逢公富士山，櫻花樹下軫時艱。有歌動地催芽發，無力回天奈石頑。灼見今猶遭避忌，新詞誰共嘆爛斑。不堪更屬赤旌世，乙丑詩篇盡被刪。

於紐黑文過年

未傷節物異邦稀，自挂燈籠換彩衣。雪氣寒增山色秀，糕香暗襯月光暉。歡言陋舍春如至，勸酒嬌妻暈欲飛。最愛稚兒雖懵懂，也頻拍手慶予歸。

小兒十四個月學步

左甩皮球右撻筐，明明空手已郎當。每於牆角翻箱樂，偷入齋中嚙紙忙。檀口灑涎香漠漠，珠喉壯膽志昂昂。人生跌倒知常事，卷土重來未或遑。

元宵節父生辰日於紐約逢雪

一從他歲食湯圓，已誤趨庭十八年。雪墜獨懷蟾魄碎，柑香擬共路人傳。案前擲筆狂吟客，憶裏張燈不夜天。欲寐家家偏舞鏜，如撾如摻競淵淵。

重讀楊憲益《銀翹集》

張口時將鳥語連，紅樓亂譯怪成篇。敲詩無益還敲鬼，出律偏夸未出千。名士有丸難解毒，夷姜同獄莫須天。官權黨國曾排次，總擺良心第一先。

重讀聶紺弩

弓背搓繩未有哀，江山草就我曹臺。秦皇漢武終脩脯，馬勃牛溲是藥材。幾桶溷澆中外飽，千秋孽付鬼神猜。平生四腳常投地，臭眼看渠滾下來。

唐太宗

2015/9/9

蘭成效作：指李世民《秋日敦庾信體》詩。

星劍彫弓百戰身，蘭成效作亦殊倫。矜憐宮妾隨求偶，服念縲囚屢活人。能納萬言弘讜論，豈驕一婦死忠臣。三違泰岳生前恨，卻得英名未造神。

九一八周年隨感

2015/9/21

積弱淪於訴國聯，人持刀俎莫尤天。引狼北地元為害，逐鹿中原竟自烟。舊寇藏鋒安保法，新皇閱禮太平年。偏憂肉食無謨略，杞叟鰥鰥夜不眠。

乙未中秋感作

2015/9/27

輕雲如繡夜如紗，鄉國遙望散作霞。倚梓無風偏隕瘳，染霜有我未還家。半生羈恨懸娥月，一曲商歌付露華。更憶故人音訊斷，哪堪歸雁入蒹葭。

二十餘年後於紐約邂逅 W 君有感

2015/10/3

近日余於某餐館就食，一女子驚呼余名。注視良久，不識，因報其名。余大愕。乃母校少年班 W 君也。熟睹之，則昔日羞顏未開之天才美女，已成風姿綽約之白領麗人矣。歸後細辨，仍未能合諸舊日印象。思及舊事，感慨係之。因作。

初晤緣何早不知，惟驚菡萏下天池。名花今日真舒萼，樸楸當年尚綠枝。曾對櫻桃心惴惴，每將芍藥語遲遲。幾多舊事成珠玉，散失羅敷未嫁時。

十三覃歌之炒股秘訣

2015/10/6

且任專家紙上談，天時地利戰方諳。莫持雞肋情難捨，戒得蠅頭語便酣。值市扶搖當用忍，見人顫慄大須貪。量低買入量高賣，不懼王孫有內參。

耶魯大學博物館內見商周瑚簋

2015/10/13

難問天朝與列強，劫餘依舊滯西洋。忍看玻罩青銅簋，遙想櫻唇紫蔗漿。銘刻淺深存古雅，銹斑內外透淒涼。近前不敢低聲語，生恐聞音更憶鄉。

炒股有言贈妻

2015/10/25

指顧哀哀百萬兵，野人紙上欲成名。多多益善多多損，步步為營步步傾。勝負須知無定勢，賢愚總是費公評。贈言長髮蘇家婦，希有三年始一鳴。

讀同邑才女查蕙纈《驛亭題壁》

2015/10/27

鹿夢初醒已遠遊，故家盤點散如鷗。誰知文字能成獄，翻信塵寰只納秋。枷鐐沉添關路險，風霜嚴伴淚泉流。題詩久和無從始，重恨交纏在筆頭。

南沙時事有感

2015/10/28

前時華府演諧柔，鶯語連篇鬼聽愁。養晦神龍空翼翼，耀兵禿鷲自休休。武官半恐三遺矢，文吏誰曾一獻猷。總是匹夫多問事，聖圖何日補金甌。

五言排律

登希臘邁泰奧拉有感

南村臨北觀，東客沐西風。不得神來筆，難描鬼化工。危崖低白日，曲蹬接琳宮。
古頂千年褐，新旗一點紅。鍾聲深淺裏，山色曉昏中。倦臥森林晚，驚眠宇宙窮。
人生當濟世，石固可銘功。昔士魂猶在，心當與我同。

注：

一 邁泰奧拉（希臘語：Μετέωρα，轉寫為 Metéora，意為“懸浮的石頭”，或“懸浮在空中”），是希臘東正教寺院最大和最重要的建築之一。六座寺院矗立在天然的砂巖支柱上。這些寺院在對土耳其獨立戰爭中起了重要作用。1988 年，邁泰奧拉被列入聯合國教科文組織世界遺產名錄，為自然和文化雙重遺產。

遊大提頓國家公園賦得十二韻

去國無期別，來園聊自悅。早秋天未涼，暘谷光如泄。遠眺長空窮，側聆曉籟徹。
天垠一列山，湖底萬年雪。清澗逐花飛，白雲沾浪滅。野牛爭莽原，禿鷲警危穴。
徑轉鐘聲傳，苔青人迹絕。暢遊鱗忘憂，陶遂竹持節。日落總傷情，林昏似喋血。
景無俗世喧，心有玉壺潔。此志雖勤勤，他鄉獨孑孑。最憐千里風，歸路共嗚咽。

憶新疆姑娘

君辭雲海來，迢遞雪山路。軀體自生香，肌膚猶著露。逢因月下醉，問但園中誤。
亂語縱衝動，感懷勞眷顧。水流當有思，花落良無負。苦勸高原遊，同吟西域賦。
驅羊覓夏草，信馬踏冬暮。學子愛真知，重洋求遠渡。一心難兩寄，十約不三赴。
去意與時堅，癡情對影付。長街柳帶淚，空港雨騰霧。別後未相聞，天涯只獨步。
莫非如倦客，仍是念歡故？愁緒誰人會，新家何處住？庭前秋夜風，塞外冰川樹。
俱抱萬千恨，幽幽豈可訴！

賦得我輩復登臨得臨字五言六韻

放眼皆秦鹿，登高復越吟。江山今我輩，氣象此初臨。足下商風急，天涯暮色侵。
蟬鳴悲落日，野莽羨歸禽。倦倦離人意，拳拳故友心。何當重一聚，颯爾共披襟。

紉秋蘭以為佩

未忍秋霖虐，摧蘭數葉離。滌污揚異馥，紉佩沁華滋。我慕平生潔，誰矜片物奇？
小人爭俗飾，雋彥重徽儀。營莫流芳芷，追思緬道師。懷沙荃不察，頌橘世翻疑。
欲致魂歸賦，難儔天問辭。滄浪今濁矣，撫蕙與君期。

樂府

獨不見

文偕東晉滅，詩入晚唐無。遂使千餘載，重悲絕抒途。遊雲愁意盡，落日別情枯。之子獨不見，殘杯同向隅。

遊子吟 男兒志四方

男兒志四方，慷慨越重洋。輾轉十余載，始知憶故鄉。鄉遠不可憶，憶鄉淚沾裳。別時無情雨，此夜又茫茫。

子夜吳歌四首

三年與儂違，西園又芳菲。東風恨無翼，不得載君歸。

促織鳴夜長，吳越摘桃忙。欲待遠人歸，敷油棉中藏。

涼風從西來，今日及此處。中有吳谷香，間雜紅薯蕷。

雲起吳天末，寒冰傷契闊。風面利如刀，心頭痛如割。

日居月諸

日居月諸，黃鍾傾乎？世人選樂，鼙鼓衡之。瓦釜雷鳴，不可更之。川犬也笑，戚施為卿。

日居月諸，正儀死乎？世人擇美，盲瞽視之。佻傚獨紫，不可止之。鸞鳥也歿，戚施居祀。

日居月諸，斯文末乎？世人取士，無德奪之。亂象曷已，不可撥之。歌者也逝，戚施在碣。

善哉行八解 來日大難 其一 不得其死

來日大難，不得其死。妻離子散，朝遷夕徙。
散髮跣足，老犬不齒。鳶肩偃背，駑駘俯視。
匍匐局躅，又疥且痔。貧賤醜惡，羣囚負恥。
力士攜我，徇罰諸市。梟首示眾，屍忽悚峙。
嗚呼哀哉，難在魘裏。魘裏生恨，恨自心起。
苟活懷怨，苦嘆不已。念彼冤氣，髮盡上指。
比干剖心，義不顧己。屈原懷沙，豈獨失士？
慘淡不平，千古如此。慷慨男兒，存志則喜！

善哉行八解 來日大難 其二 不得其時

來日大難，不得其時。日月列陳，星辰差池。
困頓襤褸，莫辨華夷。雙跪賣馬，人賤物卑。
晨昏無衣，與犬謀皮。饕餮不繼，斧冰充饑。
將登燕臺，驟染癘疵。欲之長安，忽遇熊羆。
幸甚至哉，難在憂思。思裏有憾，其憾難追。
苟活存哀，乃賦此詩。思彼逝者，九泉有知。
項羽取義，良駒不離。諸葛出祁，遺恨在茲。
時不我遇，千古一悲。但歸南山，且蘭且芝。

善哉行 古道有高槐

古道有高槐，衝天幾欲接。炎炎烈日晞，郁郁長梢曄。倦鳥紛停暝，離人止踐躅。
常憂遮不嚴，努力展枝葉。

詞曲

【踏莎行】客居紐約

車馬紛囂，砧鐮遍布。煩城不見娛心處。雲圍霧鎖冷沉沉，誰憐落日瑩然去。

愛恨如烟，功名似露，他鄉頻作登樓賦。蟬嘶鶯囀映春波，夢中無限江南樹。

【西江月】紅葉

難寐今宵月夜，亂翻舊日情箋。一枚紅葉落身前，勾起傷懷無限。

纖脈依然嫵麗，榮光照樣殷鮮。秋楓無語在窗邊，只是佳人不見。

【滿江紅】喜聞遼寧號服役

怒浪驚濤，海盡處，威名遠蹈。正今日，揚眉吐氣，挺胸長嘯。萬里河山傳喜報，中華兒女齊歡笑。九州沸，聽億眾高呼，遼寧號。

天浩浩，雲渺渺。橫海纛，擎天炮。更捷如雷動，勢逾風掃。護國鐵軍正虎躍，跳梁小醜休胡鬧。如鼠串，尙睡眠惺鬆，天兵到。

【紅情】紅情賦紅蓮

瑤波澄澈，是誰人不寐，自憐孤潔。熠熠寒空，清漢星光正如泄。何況淒風乍起，水中蕩，田田涼葉。一瓣瓣，更有誰知，都染杜鵑血。

冷月，正子子。恨這般薄緣，難得來蝶，未曾見雪，無處傾懷只凝噎。自問芳華難久，何時能，兩廂愉悅。卻還怕，情重後，又成決裂。

【臨江仙】反貪有感

九州千年幾包公？休期打虎英雄！官兼政法禍無窮。治標除腐，過隙立成空。

行賄溜須還拍馬，哀民爭作幫凶！漫歌功德早成風。皇權遺毒，各自問心中。

【浣溪沙】不惑年生日戲作

2015/2/10

不惑果然尷尬年，乍悲乍喜一時間，矧茲忽雪忽晴天。

老樹綻花容易見，少陵四十解詩篇，須雲遊子已超前。

【南呂·四塊玉】春來

百草疏，群花敗，放眼河山遍枯槐，怎有人會把秋風愛？葉盡衰，客正哀，天哪春快來！

堆雪人，聆冬籟，最愛乾坤盡皚皚，那梅花怒放瑤窗外。信美乎，真快哉，只求春莫來！

蝶不乖，蜂胡采，厭倦東風百花歪，恨太多燕雀都成害。山鐵青，水慘白，不意春竟來！

草不擡，花應壞，酷暑炎炎最難捱，縱有錢逝景如何買？口太乾，眼盡白，幾時春再來！

【中呂·朝天子】曲苑小插曲

[過客]

版主！版主！今個有怪事瞧您訴。
俺先前大作《醋葫蘆》，那可真是千金賦。
人念了人驚，天聽了天妒，豈不遠勝甚麼司馬如？
問汝！問汝！加精怎把驪珠誤？

[版主]

我吐！我吐！還真能亂攪油和醋。
且不提平仄太糊塗，只那白字如何恕？
明看是黃犢，狂稱是白鷺，何不算算曾讀幾本書？
惡補！惡補！告你方是光明路！

【雙調·折桂令】時光

到老來、忽惜時光。欲惜時光，怎惜時光？
已四體僵僵，六神恍恍，兩鬢蒼蒼。
看鏡前、顏殊意傷。剩夢中、年少情狂。
曾插野花黃，追彩蝶忙，比昼眠長，矜粉箋香。

【中呂·上小樓】山上苗

你欺瞞了日華，你濫充著高大。
你倚仗著能爬，遮死了春芽，遮敗了秋花。
你盡管夸！風會刮，雪終來壓！
恁時候，再看你稱霸！

【中呂·山坡羊】三國尾聲嘆

周郎行詐，東風翻卦，梟雄一戰都稱霸。

據窮峽，守低洼，還不如曹魏平天下，免落得兒孫成笑話。
蜀，只愛耍；吳，只愛殺。

【雙調·水仙子】紐約春節上班

晨開衝雪上咱的班，零下十三真那個寒。
新春賀歲春何在，須笑金羊只太趕！
苦的是賺錢難，樂的是熬過了年關。
哎！妻兒盼，父母單，且謊報個事業如竿！

【雙調·落梅風】約人

夕陽下，自個傻，只怪那，雨晴翻卦。
見黃鴨，抓起泥巴去打。
卻低頭，捏將美人身架。